



Kinsa Ako Nga
HARI
Man Ang
Nagpakamatay
Sa
Akong Dapit?

Tinigom ug gihan-ay ni Watson Goodman

Libre — Dili ibaligya

KINSA AKO?

Ang atong Magbubuhat nasayod kon kinsa kita, ug kining tanan makita diha sa Iyang PULONG diin atong masayran “Kang Kinsa Kita Gihimo”, “Nahimo Kitang Unsa”, “Asa Kana Magamando Kanato”, ug “Mahimo Kitang Unsa” pinaagi sa pagdawat sa kaluwasan sa Dios.

Ang ubng tawo wala mahibalo sa kaluwasan sa Dios. Ang uban bahin lang ang nahibaw-an mahitungod niini. Ang uban dili buot nga luwason sa Dios, samtang ang uban midawat ug nagmahal niini ug sa ilang pagkalinuwas ilang nasuta nga diha kang Jesu-Cristo sila nahimong tawo nga ang eternal nga destino mao ang langit.

Ang akong eternal nga kalag takos gayod sa akong pagtugot sa Magbubuhat sa paghimo niini diha sa Iyang kaugalingon! Kini mahimo nga pagsalikway Kaniya ug ang resulta sa pagkawalay bili diha sa walay pagkatapos nga eternidad, o ang pagdawat ug matinumanong pagsugot sa pagtuot Kaniya sa pagpalingkod kanato ingon nga Iyang asawa diha sa Trono sa Kalibotan uban Kaniya!

Watson Goodman (1920-2002)

ANG DAKONG TUYO SA DIOS PAGBUHAT SA TAWO 1

*Siya Magbaton ug Dayon
nga Asawa*

...Malipay ang pamanhonon tungod sa iyang pangasaw-onon, malipay usab ang imong Dios tungod kanimo. —Isaias 62:5b

“Niadto unyang adlawang paghari sa Dios mahisama niini: Adunay napulo ka dalaga nga nagdala sa ilang mga suga ug nanglakaw aron pagsugat sa pamanhonon.... Tungang gabii na kadto sa dihang milanog ang usa ka singgit, ‘Ania na ang pamanhonon!’ ”
—Mateo 25:1 ug 6a

Si Cristo—Ang Bana

Nangabubho ako alang kaninyo sama gayod sa Dios kay sama man kamo sa putli nga dalaga nga akong gisaarang ipakasal sa usa lamang ka lalaki nga mao si Cristo.
—2 Corinto 11:2

Si Jesus mitubag, “Naghunahuna ba diay kamo nga magsubo ang mga dinapit sa kombira sa kasal samtang ang pamanhonon uban pa kanila? Dili gayod! Apan moabot ang panahon nga ang pamanhonon kuhaon gikan kanila ug magpuasa na unya sila.”
—Mateo 9:15

TUNGOD NIINI GIBUHAT SA DIOS ANG TAWO SUMALA SA IYANG DAGWAY

*Walay Ubos nga Binuhat Arang
Mahimong Asawa Niya*

Busa gibuhat sa Dios ang tawo,
lalaki ug babaye, sama sa iyang
dagway. —Genesis 1:27

Sa wala pa buhata ang kali-
botan gipili na kita sa Dios diha
kang Cristo aron mahimo kitang
balaan ug walay sala sa iyang
atubangan. —Efeso 1:4a

Takos sa Pagpakig-ambit sa Dios

...Pinaagi sa maong mga gasa
...makaambit sa diosnong kinai-
ya (2 Pedro 1:4b). ...mag-aambit
sa himaya nga ipadayag unya,

naghangyo kaninyo (1 Pedro
5:1b). ...makaambit sa saad sa
Dios diha kang Cristo Jesus
(Efeso 3:6b). ...nga naghimo ka-
ninyong takos sa pag-ambit sa
gitagana sa Dios alang sa iyang
katawhan didto sa gingharian sa
kahayag (Colosas 1:12b). ...mga
magtutuo ra man usab nga ilang
gihigugma (1 Timoteo 6:2b). Kay
kitang tanan kauban ni Cristo...
(Hebreo 3:14a). ...nakatilaw sila sa
gasa sa langit ug nakapakig-ambit
sa Espiritu Santo (Hebreo 6:4b). ...
aron makaambit kita sa iyang pag-
kabalaan (Hebreo 12:10b).

...Kay gibuhat man ang tawo sama sa Dios. —Genesis 9:6b

“Ang Dios nga nagbuhat sa kalibotan ug sa tanan nga ania niini...kay siya man mismo ang naghatag ug kinabuhi sa tawo ug sa tanang butang. Gikan sa usa ka tawo gibuhat niya ang tanang kaliwat sa katawhan ug gipapuyo sila sa tibuok kalibotan.... Aron mangita sila kaniya sa pamasin nga makit-an nila siya. Apan ang tinuod mao nga ang Dios dili layo kanato kay ‘Diha kaniya kita may kinabuhi ug naglihok ug nahimong mao kita.’ Ingon sa gisulti sa pipila sa inyong mga

magbabalak, ‘Iya usab kitang mga anak.’ Ug kay mga anak man kita sa Dios, dili nato hunahunaon nga ang Dios sama sa dagway sa larawan nga bulawan o plata o bato nga gikulit pinaagi sa kahanas sa tawo.”

—Mga Buhat 17:24a, 25b, 26a, 27-29

Si Adan, Gihimo Sumala sa Dagway sa Dios, Nagpasanag sa Himaya nga Sama sa Himaya sa Dios
Jesus...samtang nagtan-aw sila kaniya, nausab ang iyang panagway. Ang iyang nawong misanag sama sa adlaw ug ang iyang bisti mihayag sa kaputi.

—Mateo 17:1a, 2

GIKAN SA PAGKABALAAN NGADTO SA SALA UG KANGITNGITAN

Ang kasulatan nag-ingon, “Pag-balaan kamo kay ako balaan man.” —1 Pedro 1:16

Nakasala ang tanan ug nahilayo sa himaya sa Dios. —Roma 3:23

“Kinsa may makatukib sa kasingkasing sa tawo? Walay molabaw niini kamalimbongon ug labihan kini kadaotan.”

—Jeremias 17:9

Unya nakita sa GINOO nga hilabihan kadaotan sa mga tawo sa kalibotan ug kanunay lamang ngil-ad ang ilang gihunahuna.

—Genesis 6:5

Pinaagi sa pagkamasupilon sa

usa ka tawo daghan ang nahimong makasasala. Pinaagi usab sa pagkamatinumanon sa usa ka tawo daghan ang gihimong matarong sa Dios. —Roma 5:19

“Apan motubag siya pag-usab, ‘Wala ako mahibalo kon taga diin kamo. Palayo kamo kanako—kamong mga daotan!’ ”

—Lucas 13:27

Ug kini mao ang silot: ang kahayag mianhi sa kalibotan apan gipalabi sa mga tawo ang kangitngit kay sa kahayag, kay daotan man ang ilang binuhatan.

—Juan 3:19

KARON UNSA NA MAN ANG RELASYON UBAN SA DIOS?

5

Ang Nahulog nga Tawo Mahugaw

Sama kami sa tawong hugaw, ug ang among matarong nga buhat sama lamang sa hugawng pahiran. Nangalaya kami daw dahon ug ang among pagkadaotan daw hangin nga mipadpad kanamo. —Isaias 64:6

*Ang Dayon nga Kamatayon
Ania Kanako*

Miabot sa kalibotan ang sala pinaagi sa usa ka tawo ug ang sala nagdalag kamatayon. Busa mi-kaylap ang kamatayon ngadto sa tanang katawhan kay nakasala man ang tanang tawo. —Roma 5:12

Busa ang pagpakasala sa usa ka tawo maoy nahimong hinungdan nga silotan ang tanan....

—Roma 5:18a

*Ang Sala Nagpahimulag Kanako
Gikan sa Dios*

Ang inyo hinuong kalapasan maoy nag-ulang kaninyo ug sa inyong Dios.... —Isaias 59:2a

*Ako Mohatag ug Husay
Ngadto sa Dios*

Busa ang tagsatagsa kanato maghatag ug husay sa iyang kaugalingon ngadto sa Dios.

—Roma 14:12

*Diha sa Pagkahulog, Ako
Nahisama sa Yutang Konon,
Balili, ug Inalisngaw*

Apan Amahan ka gihapon namo,
O GINOO; kami ang lapok, ikaw
ang magkukulon; kaming tanan
imong mga binuhat.—Isaias 64:8

Wala kamo masayod kon unsay
mahitabo kaninyo ugma! Sama
kamo sa gabon nga makita sa
makadiyot ug unya mahanaw.

—Santiago 4:14

Kay nag-ingon ang kasulatan,
“Ang tanang mga tawo sama sa
sagbot, ug ang tanan nilang ka-
tahom sama sa bulak niini. Ang

sagbot mamatay ug malarag ang
bulak niini. —1 Pedro 1:24

*Maako ang Pagkawalay Kamata-
yon ug Kinabuhing Dayon
Diha kang Kristo*

“Ug ang tanan nga buhi ug
nagtuo kanako dili gayod mama-
tay. Mituo ka ba niini?”

—Juan 11:26

Ang pagpamatuod mao kini:
ang Dios naghatag kanato sa ki-
nabuhing walay kataposan ug anaa
kini sa iyang Anak. Ang midawat sa
Anak may kinabuhing walay kata-
posan. Apan ang wala modawat sa
Anak sa Dios wala makabaton sa
maong kinabuhi. —1 Juan 5:11, 12

...Hangtod sa pagbalik sa atong Ginoong Jesu-Cristo.... Siya ang Dios nga dalaygon ug bugtong Magbubuhat, ang Hari sa mga hari ug ang Ginoo sa mga ginoo. Siya lamang ang walay kama-tayon ug nagpuyo sa kahayag nga dili maduol. Wala pa gayoy nakakita kaniya ug wala gayoy makakita kaniya. Ipahinungod kaniya ang dungog ug walay ka-taposang gahom! Amen.

—1 Timoteo 6:14b, 15b, 16

Ablihi ang mga ganghaan! Buk-si ang karaang mga pultahan kay mosulod ang gamhanang

hari! Kinsa ba kining gamha-nang hari? Ang GINOO nga kus-gan ug gamhanan! Ang GINOO nga madaugon sa panggubatan! Ablihi ang mga ganghaan! Buk-si ang karaang mga pultahan kay mosulod ang gamhanang hari! Kinsa ba kining gamhanang hari? Ang GINOO nga Labing Gamhanan, siya ang madaugong hari!

—Salmo 24:7-10

Ang GINOO mao nay maghari sa tibuok kalibotan. Niadto unyang panahona ang ngalan ra sa GINOO maoy pasidunggan ingon nga GINOO.

—Zacarias 14:9

8 SI JESU-CRISTO NAGPAHIBALO SA IYANG PAGKA-HARI

Si Jesus mitubag, “Ang akong gingharian dili iya niining kalibotana. Kon ang akong gingharian iya pa niining kalibotana, ang akong mga sakop makig-away unta aron dili ako ikatugyan ngadto sa mga Judio. Apan ang akong gingharian dili iya niining kalibotana!” Tungod niini nangutana si Pilato kaniya, “Hari ka ba diay?” Si Jesus mitubag, “Nag-ingon ka nga hari ako. Tungod niini ako natawo ug mianhi sa kalibotan alang sa usa lamang ka tuyo nga mao ang pagsaksi sa kamatuoran. Ang anaa sa kamatuoran mamati kanako.” —Juan 18:36, 37

...“Ikaw ba ang Mesiyas nga

Anak sa Dalaygon nga Dios?” Si Jesus mitubag, “Ako! Ug makita unya ninyo ang Anak sa Tawo nga maglingkod sa tuo sa makagagahom nga Dios ug moabot uban sa mga panganod sa langit!” —Marcos 14:61b, 62

“Inig-anhi sa Anak sa Tawo ingon nga Hari uban sa tanang mga anghel, molingkod siya sa iyang harianong trono....Unya ang Hari moingon sa mga tawo sa iyang tuo, ‘Duol kamo nga gipanalanginan sa akong Amahan ug dawata ninyo ang Ginghamian nga giandam alang kaninyo sukad pa sa pagbuhat sa kalibotan.’ ”

—Mateo 25:31 ug 34

ANG KINAIYA SA GINGHARIAN NI JESU-CRISTO 9

Apan bahin sa iyang Anak, miingon ang Dios: “Ang imong trono, O Dios, molungtad hangtod sa kahangtoran! Ug uban sa hustisya maghari ka sa imong gingharian.” —Hebreo 1:8

...“Ang gingharian sa kalibotan nahimo nang gingharian sa atong Ginoo ug sa iyang Cristo ug maghari siya hangtod sa kahangtoran!” —Gipadayag 11:15b

Unya miingon siya, “Mao kini ang tinuod: gawas kon mausab kamo ug mahimong sama sa mga bata, dili gayod kamo makasulod sa Gingharian sa langit.

Ang labing dako ilalom sa pagmando sa Dios mao kadtong magpaubos sa iyang kaugalingon ug magpakasama niining bataa. —Mateo 18:3, 4

Naghangyo usab ako nga lamdagan unta ang inyong salabotan aron masayod kamo unsa ang paglaom nga alang niini gitawag kamo ug aron masayran ninyo ang kadagaya sa mga panalangin nga gisaad niya sa iyang balaang katawhan. Giampo ko usab nga masayran ninyo ang kadako sa iyang gahom nga ania kanato nga nagtuo kaniya....

—Efeso 1:18, 19a

10 **ANG MGA KINAIYA SA HARI SA HIMAYA**

“Kay gihatagan mo siyag katu-
ngod ibabaw sa tanang tawo
aron hatagan niyag kinabuhing
dayon ang tanan nga imong gi-
tugyan kaniya.” —Juan 17:2

Iyang gigamit sa pagbanhaw
ug pagpalingkod kang Cristo
sa iyang tuo didto sa langit. Did-
to naghari si Cristo labaw sa
tanang mga hari ug sa mga anaa
sa gahom ug sa mga namunoan
ingon man sa mga pangulo. La-
baw gayod siya sa tanan dili la-
mang niining panahona kondili
sa umaabot usab. Gibutang sa
Dios ang tanan ubos sa pagman-
do ni Cristo ug alang sa simba-

han gihimo siyang pangulo nga
labaw sa tanan. Ang simbahan
mao ang lawas ni Cristo, ang
kahingpitan niya nga mao ang
naghingpit sa tanang butang.

—Efeso 1:20-23

Siya ang miadto sa langit ug
atua na sa tuo sa Dios, nagman-
do sa mga anghel ug sa mga la-
ngitnong gahom. —1 Pedro 3:22

“Ako anaa kanila ug ikaw ania
kanako aron sila mausa ug sa
ingon masayod ang kalibotan
nga ikaw nagpadala kanako ug
nga nahigugma ka kanila sama
nga ikaw nahigugma kanako.”

—Juan 17:23

DILI MASUKOD NGA BAHANDI, GAHOM, UG KAALAM 11

Miduol si Jesus ug miingon kanila, “Gihatag kanako ang tanang gahom sa langit ug sa yuta.” —Mateo 28:18

Apan alang niadtong gitawag sa Dios, Judio siya o Grego, si Cristo mao ang gahom ug ang kaalam sa Dios. —1 Corinto 1:24

Gihimo ko kini aron madasig sila nga mahugpong sa gugma ug makabaton sa tanang kabu-lahanan nga ikahatag sa matu-od nga kahibalo. Sa ingon, ma-sayran nila ang tinago sa Dios nga mao si Cristo. Diha kaniya

natago ang tanang bahandi sa kaalam ug kahibalo sa Dios.

—Colosas 2:2, 3

Ug nag-ingon: “Ginoong Dios nga Labing Gamhanan, nga mao gihapon karon ug kaniadto! Nag-pasalamat kami kanimo nga gi-gamit nimo ang imong dakong gahom ug gisugdan mo na ang imong paghari!”

—Gipadayag 11:17

“Ang Nating Karnero nga gipa-tay takos sa pagdawat sa gahom, sa bahandi, sa kaalam ug sa ku-sog, sa dungog, sa himaya ug sa pagdayeg!” —Gipadayag 5:12b

Ang iyang gingharian motadlas unta gikan sa usa ka dagat ngadto sa laing dagat, gikan sa Suba sa Eufrates ngadto sa tibuok kalibotan. Ang tanang hari moyukbo unta kaniya; ang tanang kanasoran mag-alagad kaniya!

—Salmo 72:8 ug 11

Ang mga hari nila naghiusa ug ang ilang mga pangulo nagkasabot pag-alsa batok sa GINOO ug sa hari nga iyang pinili. Sila nag-ingon: “Putlon nato ang paghari nila kanato ug dili na kita magpagalong kanila.” Ang Ginoo nga naglingkod sa iyang trono didto sa langit nagkatawa lang ug nagbiaybiay kanila....Nag-ingon siya,

“Sa Sion, ang bungtod kong balaan, gipahimutang ko ang pinili kong hari.” Nag-ingon ang hari, “Isangyaw ko ang giingon kanako sa GINOO. Miingon siya kanako, ‘Ikaw akong anak; ug karong adlaw imo na akong amahan.’ ”

—Salmo 2:2-4 ug 6-7

Kinsa may dili mahadlok kanimo nga hari ka man sa tanang kanasoran? Angay kang kahadlok sa tanan! Walay sama kanimo sa tanang maalamong tawo sa nagkalainlaing nasod ug sa tanan nilang mga gingharian. Apan ikaw, O GINOO, mao ang matuod nga Dios; buhi ka ug hari hangtod sa kahangtoran. —Jeremias 10:7 ug 10a

“Ako mao si Yahweh ug mao kana ang akong ngalan; dili ko gayod ihatag kang bisan kinsa ang akong himaya, o ang akong dungog ngadto sa mga larawan nga diosdios.” —Isaias 42:8

Kay ang GINOO gamhanang Dios, gamhanang hari nga labaw sa tanang dios. —Salmo 95:3

“Unya motungha sa langit ang timaan sa Anak sa Tawo ug manghilak ang tanang banay sa yuta ug makakita sila sa Anak sa Tawo nga moabot sinapnay sa mga panganod sa langit. Moabot

siya nga may gahom ug dakong himaya.” —Mateo 24:30

“Among Ginoo ug Dios! Angay kang modawat sa pagdayeg ug sa pasidungog ug sa gahom. Kay ikaw may nagbuhat sa tanang butang, ug pinaagi sa imong pagbuot namugna ang tanan.”

—Gipadayag 4:11

Alang sa Hari nga walay kataposan, walay kamatayon ug dili makita, ang bugtong Dios—kaniya ang dungog ug himaya hangtod sa kahangtoran! Amen.

—1 Timoteo 1:17

14 ANG MAGBUBUHAT NGA HARI MAOY NAGAMANDO

Walay kataposan ang pag-uswag sa iyang pagmando, ug molungtad ang kalinaw....

—Isaias 9:7a

Alaot ang makig-away sa iyang magbubuhat!... Alaot ang moingon ngadto sa iyang amahan ug inahan, “Nganong gipakatawo pa man ko ninyo?” Mao kini ang giingon sa GINOO, ang Ba-laang Dios ug Magbubuhat sa Israel: “Wala kamoy katungod pagpangutana kanako bahin sa akong mga anak. Ayaw ako nin-yog tudloi sa akong buhaton. Ako ang nagbuhat sa kalibotan ug diha niini gibuhat ko usab

ang tawo; ang akong kamot maoy naghikyad sa kalangitan, ug ako ang nagmando sa tanan nga anaa sa kalangitan. Ako ang nag-agni kang Ciro aron tumanon niya ang akong mga tuyo sa pagpahamtang sa hustisya. Patagon ko ang dalan nga iyang agian....” —Isaias 45:9a, 10-13a

Ug kaniya gihatag ang gahom, ug ang himaya ug ang gingharian, aron mag-alagad kaniya ang tanang katawhan. Walay pagkatapos ang iyang gahom kay dili man malumpag ang iyang gingharian.
—Daniel 7:14

ANG HARI SA HIMAYA NAGPAKAMATAY ALANG KANAKO!

15

*Sa mga Mata sa Dios ang Sala
Makalilisang Aron Himoon
Kini nga Paagi*

Kay si Cristo namatay sa ma-
kausa lamang tungod sa atong
mga sala, ang matarong alang sa
mga dili matarong, aron pagdala
kanato ngadto sa Dios. Gipatay
siya ingon nga tawo apan giban-
haw diha sa espiritu.

—1 Pedro 3:18

...Ang Ginoong Jesu-Cristo...
nagtugyan sa iyang kaugalingon
tungod sa atong mga sala aron
pagluwas kanato gikan sa pagka-
daotan niining panahona sumala

sa kabubut-on sa atong Dios ug
Amahan. —Galacia 1:3b, 4

*Gitagna ang Dapit ug Paagi sa
Kamatayon ug Pagkabanhaw*

“Pamati kamo: nagpadulong
kita sa Jerusalem ug didto ang
Anak sa Tawo itugyan ngadto
sa kadagkoan sa mga pari ug sa
mga magtutudlo sa Balaod. Siya
hukman nila sa kamatayon ug
unya itugyan nila ngadto sa mga
dili Judio. Bugalbugalan siya
ug latoson ug ilansang sa krus.
Apan sa ikatulo ka adlaw ban-
hawon siya.” —Mateo 20:18, 19

16 BILILHONG DUGO—BILILHONG MANLULUWAS

Apan karon nahiusa na kamo kang Cristo Jesus; kamo nga kaniadto layo sa Dios, karon nahiduol na pinaagi sa dugo ni Cristo.
—Efeso 2:13

...May hingpit kitang kagawasan sa pagsulod sa Labing Balaang Dapit pinaagi sa dugo ni Jesus. Gibuksan niya alang kanato ang usa ka bag-ong agianan, usa ka buhing agianan....

—Hebreo 10:19b, 20a

...Pinaagi sa dugo sa walay kataposang kasabotan.

—Hebreo 13:20b

“Gipili ko ang usa ka bililhong bato, nga karon akong gibutang

aron himoong sukaranan sa Sion; ug ang mosalig kaniya dili gayod mapakyas.” Kining bato-ha mahal kaayo alang kaninyo nga nagtuo. —1 Pedro 2:6b, 7a

...Gihigugma kita niya ug pinaagi sa iyang dugo giluwat kita niya sa atong mga sala.

—Gipadayag 1:5b

...Nakigdait ang Dios pinaagi sa dugo sa iyang Anak didto sa krus.

—Colosas 1:20b

Ang Bana Mangita sa Iyang Asawa

“Kay mianhi ang Anak sa Tawo aron pagpangita ug pagluwas sa nawala.” —Lucas 19:10

GIBUNTOG NI KRISTO ANG IKADUHAN KAMATAYON UG IMPIYERNO ARON PAGLUWAS KANAKO GIKAN NIINI

17

...Ang tawo nga makasala ma-
matay. —Ezequiel 18:4b

Miabot sa kalibotan ang sala pi-
naagi sa usa ka tawo ug ang sala
nagdalag kamatayon. Busa mi-
kaylap ang kamatayon ngadto sa
tanang katawhan kay nakasala
man ang tanang tawo. —Roma 5:12

Kay ang bayad sa pagpakasala
mao ang kamatayon. —Roma 6:23a

*Ang Kamatayon Gibuntog
Alang Kanako*

...Gihatag niya kanato kining
maong grasya diha kang Cristo

Jesus sukad pa sa sinugdanan
apan karon gipakita na kanato
pinaagi sa pag-abot sa atong
Manluluwas nga si Cristo Jesus.
Gibuntog niya ang gahom sa ka-
matayon ug pinaagi sa Maayong
Balita gipadayag niya ang kina-
buhing walay kataposan.

—2 Timoteo 1:9b, 10

“Ako ang buhi! Namatay ako
apan tan-awa, buhi ako ug dili na
gayod mamatay. Ilalom sa akong
gahom ang Kamatayon ug ang
Hades.” —Gipadayag 1:18

18 ANG HARI NAGHATAG UG KALUWASAN SA TANAN NGA SA KINASINGKASING NAGTINGUHA NIINI

...Cristo namatay alang sa atong mga sala sumala sa nahi-sulat sa Kasulatan.

—1 Corinto 15:3b

“...Simbahan sa Dios nga naiya pinaagi sa dugo sa iyang Anak.”

—Mga Buhat 20:28b

Namatay siya alang sa tanang mga tawo aron ang mga buhi dili na magkinabuhi alang sa ilang kaugalingon kondili alang kaniya nga namatay ug gibanhaw tungod kanila.

—2 Corinto 5:15

“Naghisgot mahitungod kaniya ang tanang mga propeta nga

nag-ingon nga ang tanan nga nagtuo kaniya pasayloon sa ilang mga sala pinaagi sa iyang ngalan.”

—Mga Buhat 10:43

Ang Ginoo dili maglangan pag-tuman sa iyang gisaad sumala sa gihunahuna sa uban. Apan siya nagpailob kaninyo kay dili siya buot nga may usa nga malaglag kondili nga ang tanan maghinul-sol ug mobiya sa ilang mga sala.

—2 Pedro 3:9

Mangita kamo kanako ug makap-lagan ako ninyo sa dihang kinasingkasing ang inyong pagpa-ngita kanako.

—Jeremias 29:13

PANAG-AWAY TALIWALA SA DIOS UG SA SALA 19

Sa walay duhaduha nasayod kamo nga ang mga daotan dili makasulod sa Ginghamian sa Dios.... —1 Corinto 6:9a

Kay kadtong nagkinabuhi sumala sa ilang tawhanong kinaiya naghunahuna kanunay sa mga butang nga tawhanon ingon nga kadtong nagkinabuhi sumala sa Espiritu naghunahuna kanunay sa espirituhanong mga butang. Ang paghunahuna kanunay sa mga butang nga tawhanon mosangpot sa kamatayon apan ang paghunahuna kanunay sa mga butang nga espirituhanon mo-

sangpot sa kinabuhi ug kalinaw. Busa kaaway sa Dios ang tawo nga kanunayng maghunahuna sa mga butang nga tawhanon kay dili man siya motuman sa balaod sa Dios ug dili gayod siya makatuman niini. Ang tawo nga nagkinabuhi sumala sa tawhanong kinaiya dili gayod makapahimuot sa Dios. —Roma 8:5-8

Mga maluibon! Wala ba kamo masayod nga ang pagpakighigala sa kalibotan maoy pagpakig-away sa Dios? Kay kadtong buot maki-ghigala sa kalibotan nakig-away sa Dios. —Santiago 4:4

20 ANG PAAGI ARON PAGADAWATON SA HARI

Dili ka gayod molampos sa kinabuhi kon tagoan mo ang imong mga sala. Isugid kini ug paghinulsol ug kaluy-an ka sa Dios. —Panultihon 28:13

Ang Dios gugma ug ang nagkinabuhi subay sa gugma anaa sa Dios ug ang Dios anaa kaniya.

—1 Juan 4:16b

Apan kadtong midawat ug misalig kaniya gihatagan niya sa katungod nga mahimong mga anak sa Dios. —Juan 1:12

Ug samtang nagpanaw sila nahibot sila sa usa ka dapit nga may tubig ug ang opisyal miingon, “Ania may tubig, nganong

dili mo man ako bunyagan?” Si Felipe miingon kaniya, “Mahimong bunyagan ka kon kinasingkasing gayod ang imong pagtuo.” Ang opisyal mitubag, “Oo, mituo ako nga si Jesu-Cristo mao ang Anak sa Dios.”

—Mga Buhat 8:36, 37

Aron ang inyong pagtuo dili mag-agad diha sa kaalam sa tawo kondili sa gahom sa Dios.

—1 Corinto 2:5

Busa miingon si Jesus sa mga nanuo kaniya, “Kon tumanon ninyo ang akong pagtulon-an, tinuod gayod nga kamo akong mga tinun-an.” —Juan 8:31

ANG KALUWASAN MAOY BUHING RELASYON 21 UG PAKIG-AMBITAY UBAN KANG CRISTO

Hinaot pa unta nga masayod kamo sa dili matugkad nga gugma ni Cristo ug sa ingon niana makinabuhi ninyo ang kinaiya sa Dios.
—Efeso 3:19

Kasaligan ang Dios nga nagtawag kaninyo aron mahiusa sa iyang Anak nga si Jesu-Cristo nga atong Ginoo.—1 Corinto 1:9

“Apan dili kamo motuo tungod kay dili man kamo akong mga karnero. Ang akong mga karnero mamati sa akong tingog. Nakaila ako kanila ug sila nagsunod kanako. Naghatag ako kanila sa kinabuhing dayon ug dili na

gayod sila mangamatay ug walay makaagaw kanila gikan kanako.”
—Juan 10:26-28

Ug tungod niini nag-antos ako. Apan wala ko kini ikaulaw kay nakaila ako sa akong gisaligan ug sigurado ako nga siya takos nga makaamping sa iyang gipiyal kanako hangtod niadtong Adlaw.
—2 Timoteo 1:12

Busa kadtong nag-antos sumala sa kabubut-on sa Dios, kinaanglan magbuhat sa maayo ug magtugyan sa ilang kaugalingon ngadto sa ilang Magbubuhay nga matinumanon sa iyang saad.
—1 Pedro 4:19

22 MATAWO UG BAG-O, MAKALAGAD NA SA GINOO

Mao ray makabuntog sa kalibotan ang nagtuo nga si Jesus mao ang Anak sa Dios. —1 Juan 5:5

Nahimo silang mga anak sa Dios dili sa tawhanong paagi o pagbuot. Ang Dios mismo mao ang naghimo kanilang iyang mga anak. —Juan 1:13

“Mahibalo kamo sa kamatuoran ug ang kamatuoran maghatag kaninyog kagawasan.” —Juan 8:32

“Kon ang Anak maghatag kaninyog kagawasan, mahimo gayod kamo nga mga tawo nga gawasnon.” —Juan 8:36

Giluwas kamo gikan sa sala ug

nangahimo nang mga ulipon sa pagkamatarong.... Apan karon nga naluwas na kamo gikan sa sala ug nag-alagad na sa Dios, ang balos nga madawat ninyo mao ang pagkabalaan nga mosangpot sa kina-buhing walay kataposan. —Roma 6:18 ug 22

Gihatagan na kitag kagawasan ni Cristo. Busa pabilin kamo nga gawasnon ug ayaw na kamo paulipon pag-usab. —Galacia 5:1

Kay ikaw mahimong iyang saksi ug magmatuod ka ngadto sa tanang mga tawo mahitungod sa imong nakita ug nadungog.

—Mga Buhat 22:15

NATAWO PAG-USAB! KARON KINSA AKO? 23

Sa walay duhaduha nasayod kamo nga ang mga daotan dili makasulod sa Gingharian sa Dios.... Apan nahugasan na kamo sa inyong mga sala ug gihalad na kamo ngadto sa Dios. Gimatarong na kamo sa Dios pinaagi sa ngalan sa Ginoong Jesu-Cristo ug pinaagi sa Espiritu sa atong Dios.

—1 Corinto 6:9a, 11b

...Gihigugma kita niya ug pinaagi sa iyang dugo giluwes kita niya sa atong mga sala. Gihimo kita niyang usa ka gingharian sa mga pari aron mag-alagad sa iyang Dios ug Amahan. Iya ni Jesu-Cristo ang dungog ug ga-

hom sa walay kataposan! Amen.

—Gipadayag 1:5b, 6

Mahimo kang matahom nga korona diha sa kamot sa GINOO, usa ka harianong korona diha sa kamot sa imong Dios. —Isaias 62:3

Taas na ang Kahimtang

Nag-ampo ako nga mausa unta sila. Amahan, mausa unta sila dinhi kanato sama nga ikaw ania kanako ug ako anaa kanimo....

—Juan 17:21a

Wala ba kamo masayod nga ang balaang katawhan sa Dios maoy maghukom sa kalibotan?

—1 Corinto 6:2a

24 GIBUHAT ALANG SA PAGPAKIG-AMBIT UBAN SA DIOS

Ang GINOO andam nga motubag sa tanan nga mosangpit kaniya kon matinud-anon ang ilang pagtawag kaniya. —Salmo 145:18

Paglipay hinuon nga nakaambit kamo sa mga pag-antos ni Cristo aron magmalipayon kamo inigpadayag na sa iyang himaya. —1 Pedro 4:13

Magkasabot ba ang templo sa Dios ug ang sa mga diosdios? Dili! Kay kita ang templo sa Dios nga buhi. Sumala sa gisulti sa Dios, “Magpuyo ako ug makig-uban sa akong katawhan. Mahimo ako nga ilang Dios, ug mahi-

mo sila nga akong katawhan.”

—2 Corinto 6:16

...Mahiusa kamo sa Amahan ug sa iyang Anak nga si Jesu-Cristo.

—1 Juan 1:3b

Mag-uban ako kanimo iniglatas mo sa katubigan, ug dili ka malumos inigtabok mo sa mga suba; inig-agi mo sa kalayo dili ka mapaso o lamyon sa siga niini.

—Isaias 43:2

“Amahan, gihatag mo sila kanako ug buot ko nga bisan asa ako atua usab sila aron makakita sila sa akong himaya, ang himaya nga imong gihatag kanako.”

—Juan 17:24a

ANG RELASYON TALIWALA KANG CRISTO 25 UG SA TINUOD NGA MAGTUTUO

“Inig-abot niadtong adlaw, mahibalo kamo nga ako anaa sa Amahan ug kamo ania kanako, sama nga ako anaa usab kaninyo.”
—Juan 14:20

Ang Iyang Kataposang Sugo Maoy Atong Unang Kahangawa
Tungod niini, sa inyong pagpanglakaw himoa nga akong mga tinun-an ang tanang katawhan sa tibuok kalibotan. Bunyagi sila sa ngalan sa Amahan, sa Anak ug sa Espiritu Santo ug tudloi sila pagtuman sa tanan nga akong gisugo kaninyo. Ug hinumdomi!

Ako mag-uban kaninyo sa kanunay hangtod sa kataposan sa kalibotan.” —Mateo 28:19, 20

Ang Pagkamatarong sa mga Balaan Mao ang Pagkamatarong ni Cristo nga Nagpuyo sa Sulod
Kay maoy tuyo sa Dios nga ibutyag niya ngadto sa iyang katawhan ang iyang bahandianon ug mahimayaong tinago nga iyang giandam alang sa tanang katawhan. Ang tinago mao nga si Cristo anaa kaninyo. Nagpasa-bot kini nga makaambit kamo sa himaya sa Dios. —Colosas 1:27

26 ANG MAONG KALUOY, GUGMA, UG GRASYA!

Magpasalamat kita sa Dios ug Amahan sa atong Ginoong Jesu-Cristo kay tungod sa iyang dakong kaluoy gihatagan kita niya ug bag-ong kinabuhi pinaagi sa pagbanhaw kang Jesu-Cristo. Naghatag kini kanato ug paglaom nga dili matarog. —1 Pedro 1:3

Busa dili kita magpanuko sa pagduol sa trono sa Dios diin anaa ang grasya. Dinha madawat nato ang kaluoy ug ang grasya nga atong gikinahanglan.

—Hebreo 4:16

Apan dako kaayo ang kaluoy ug gugma sa Dios alang kanato. Bisan gani nga kaniadto patay na

kita sa espiritu tungod sa atong pagkadaotan, gibanhaw kita niya uban kang Cristo. Naluwas kamo tungod sa grasya sa Dios. Gibanhaw kita niya uban kang Cristo aron maghari uban kaniya didto sa kalangitan. Gibuhat kini sa Dios aron sa umaabot nga mga panahon ipakita niya ang naghingapin niyang grasya diha sa kaayo nga iyang gipakita kanato pinaagi kang Cristo Jesus. —Efeso 2:4-7

Apan pinaagi sa grasya nga gigasa sa Dios ngadto kanila, mahimo silang matarong pinaagi kang Cristo Jesus nga nagluwas kanila.

—Roma 3:24

Apan sa pag-abot na sa hustong panahon, gipadala sa Dios ang iyang Anak, gipanganak sa tawhanong inahan ug nagkinabuhi siya ilalom sa Balaod aron pagluwas niadtong nailalom sa Balaod ug aron mahimo kitang mga anak sa Dios. —Galacia 4:4, 5

Palandongang ninyo unsa ka dako ang paghigugma sa Amahan kanato! Gihigugma kita niya pagayo nga tungod niini giisip kitang mga anak sa Dios ug mao gayod kana kita.... —1 Juan 3:1a

Mga Manununod sa Dios

“Ang modaog makadawat niini gikan kanako: ako mahimong

iyang Dios ug siya mahimong akong anak.” —Gipadayag 21:7

Aron sa pagpaila nga kamo iyang mga anak, gipadala sa Dios ang Espiritu sa iyang Anak nganhi sa atong kasingkasing, ang Espiritu nga nagtuaw, “Amahan ko!” Busa dili na kamo ulipon kondili anak na. Ug tungod kay kamo iya nang anak, ang Dios maghatag kaninyo sa tanan nga anaa kaniya. —Galacia 4:6, 7

Ug kay mga anak man kita niya, madawat nato ang mga panaangin nga gitagana sa Dios ug madawat nato kini uban kang Cristo.... —Roma 8:17a

ANG DIOS NAGBUOT NGA MAHISAMA KANIYA ANG IYANG MGA ANAK

Nasayod kita nga diha sa tanang butang nagbuhat ang Dios alang sa kaayohan niadtong nahigugma kaniya, kadtong iyang mga tinawag sumala sa iyang katuyoan. Kadtong gipili nang daan sa Dios, gilain niya aron mahisama sa iyang Anak, aron ang iyang Anak mahimong kamagulangan sa daghang mga magsoon. —Roma 8:28, 29

Maglakaw Diha sa Gugma ni Cristo

“Nahigugma ako kaninyo ingon nga ang Amahan nahigugma kanako. Pabilin kamo sa akong gugma.” —Juan 15:9

Mag-alagad Sama Kang Cristo
“...Apan ako ania nagsilbi kaninyo.” —Lucas 22:27b

Magmapinasayloon
Unya miingon si Jesus, “Amahan, pasayloa sila kay wala sila mahibalo sa ilang gibuhad.” —Lucas 23:34a

Magmalulot ug Magamaayo
Ako, si Pablo, nga giingong mapainubsanon kon atubang kaninyo apan isog kon layo, nangaliyupo kaninyo. Tungod sa kalumo ug kaluoy ni Cristo. —2 Corinto 10:1

Gidasig namo kamo, gilipay ug gitambagan kanunay sa pagkinabuhi sa paagi nga makapahimuot sa Dios kinsa maoy nagtawag kaninyo aron kamo makaambit sa iyang Gingharian ug himaya.

—1 Tesalonica 2:12

Ang tawo nga wala magpabilin ug wala motuman sa pagtulon-an ni Cristo, wala kaniya ang Dios. Apan ang Amahan ug ang Anak anaa kaniya nga nagsunod sa pagtulon-an ni Cristo. —2 Juan 9

*Si Cristo Magbaton ug Asawa
nga Dili Madani sa Uban*

Bulahan ang tawo nga mobarog

taliwala sa mga pagtintal kay sa iyang pagdaog makadawat siya sa kinabuhi, ang ganti nga gisaad sa Dios alang niadtong mga nahigugma kaniya. —Santiago 1:12

“Ipakita ko kaninyo sa unsa mahisama ang tawo nga moduol kanako unya mamati sa akong gisulti ug motuman niini. Sama siya sa tawo nga nagtukod ug balay. Nagkalot siyag lawom ug gipahiluna niya ang sukaranan diha sa ibabaw sa bato. Sa dihang mibaha ang suba ug mihasmag niining balaya, wala kini matay-og kay maayo man nga pagkatukod.” —Lucas 6:47, 48

Kay pinaagi sa pagtuo naluwas kamo tungod sa grasya sa Dios. Dili kini inyong buhat kondili gasa sa Dios. Busa walay makapasigarbo niini sanglit dili man kini bunga sa inyong mga paningkamot. Mga binuhat kita sa Dios. Ug gibuhat kita niya diha kang Cristo Jesus aron magbuhat kita sa maayo nga maoy iyang tuyo alang kanato.

—Efeso 2:8-10

Daygon ta ang Dios kansang gahom ania kanato ug maoy makahatag ug labaw pa kay sa atong pangayoon o hunahunaon; daygon ta siya diha sa simbahan ug

diha kang Cristo Jesus ngadto sa tanang kaliwatan hangtod sa kahangtoran! Amen. —Efeso 3:20, 21

Himoong Hingpit Diha Kaniya

Hangtod magkahiusa kitang tanan diha sa pagtuo ug sa atong kahibalo mahitungod sa Anak sa Dios. Unya mahingkod kita sama sa kahingkod ni Cristo. —Efeso 4:13

Kay ang tibuok nga pagka-Dios anaa kang Cristo sa iyang pagkatawhanon ug gihatagan kamog hingpit nga kinabuhi diha sa inyong pagkahiusa kaniya. Labaw siya sa tanang espirituhanong pangulo ug awtoridad.

—Colosas 2:9, 10

*Ngano Siya nga Gisimba sa
Daghang mga Manulonda
Nahigugma man sa Nahulog ug
Rebelyosong tawo?*

Sa dihang gipadala sa Dios ang
iyang panganay nga Anak ngan-
hi sa kalibotan, miingon siya,
“Kinahanglan simbahon siya sa
tanang mga anghel sa Dios.”

—Hebreo 1:6

Malipayon ako uban sa kalibo-
tan ug sa katawhan.

—Panultihon 8:31

...Patay na sa Balaod kay ba-
hin man kamo sa lawas ni Cristo.
Karon iya na kamo ni Cristo nga
gibanhaw aron magkinabuhi kita

nga mapuslanon alang sa Dios.

—Roma 7:4b

Kita usab, bisan daghan, usa
lamang ka lawas nga nahiusa
diha kang Cristo ug nalambigit
kita sa usag-usa ingon nga nag-
kalainlaing bahin sa usa ka la-
was.

—Roma 12:5

*Bug-os nga Gugma
Alang sa Asawa*

Kon wala magdumili ang Dios
sa pagtugyan sa iyang Anak
ngadto sa kamatayon alang ka-
natong tanan, dili ba hatagan
usab kita niya sa tanang butang
nga atong pangayoon kaniya?

—Roma 8:32

32 PAGATUGOTAN PAGLINGKOD SA TRONO!

Ang modaog patuparon ko paglingkod sa akong trono ingon nga gipalingkod ako tupad sa akong Amahan diha sa iyang trono tungod kay midaog man ako.

—Gipadayag 3:21

Ang Siyudad sa Hari ug ang Asawa

Gipangandoy hinuon nila ang labi pang maayong nasod nga mao ang langitnong nasod. Busa wala ikaulaw sa Dios ang ilang pag-ila kaniya nga ilang Dios kay nag-andam man siyag usa ka siyudad alang kanila.

—Hebreo 11:16

Ang makadaog himoon kong haligi sa templo sa akong Dios ug magpabilin gayod siya niini. Isulat ko diha kaniya ang ngalan sa akong Dios ug ang ngalan sa siyudad sa akong Dios nga mao ang bag-ong Jerusalem nga manaog sa langit gikan sa akong Dios....

—Gipadayag 3:12a

Bulahan kadtong naglaba sa ilang bisti aron sila hatagan sa katungod sa pagkaon sa bunga sa kahoy nga naghatag sa kina-buhi ug sa pagsulod sa mga ganghaan sa siyudad.

—Gipadayag 22:14

“Busa kon kamo dili kasaligan sa inyong paggamit sa bahandi niining kalibotana, kinsay mopyal kaninyo sa tinuod nga bahandi?”

—Lucas 16:11

“Nasayod ako sa imong mga giantos ug sa imong kakabos apan ang tinuod dato ka!...”

—Gipadayag 2:9a

Kay nasayod kamo sa grasya sa atong Ginoong Jesu-Cristo. Bisan siya dato, nagpakakabos siya tungod kaninyo aron madata kamo pinaagi sa iyang kakabos.

—2 Corinto 8:9

Pahimangnoi ang mga dato

nga dili sila magmapahitas-on ug dili magsalig sa bahandi kon-dili sa Dios. Kay ang bahandi dili makahatag ug kasigurohan apan ang Dios sa walay sukod naghatag kanato sa tanan aron kita malipay. Sultihi sila sa pagbuhat ug maayo ug sa pagpadato diha sa mga maayong binuhatan, sa pagkamahinatagon ug sa pagtabang sa uban. Niining paagiha makatigom sila ug bahandi nga mahimo nilang lig-on nga sukaranan alang sa umaabot ug maangkon unya nila ang kinabuhing matuod.

—1 Timoteo 6:17-19

ANG BILI SA TINUOD NGA MGA BAHANDI ALANG KANAKO

Ilisdan niya ang atong mga lawas nga may kamatayon sa lawas nga mahimayaon sama sa iyaha pinaagi sa gahom nga gigamit niya sa pagmando sa tanan.

—Filipos 3:21

“Ug karon itugyan ko kamo ngadto sa Dios ug sa mensahe sa iyang grasya. Makalig-on siya ug makahatag kaninyo sa mga panulondon nga gitagana alang sa tanang katawhan nga iyang giba-laan.”

—Mga Buhat 20:32

Pasalamat niyo ang Amahan nga naghimo kaninyong takos sa pag-ambit sa gitagana sa Dios alang sa iyang katawhan didto sa

gingharian sa kahayag. Kay giluw-was kita niya gikan sa gahom sa kangitngit ug gidala ngadto sa ginghamian sa iyang hinigugmang Anak.

—Colosas 1:12, 13

Ako nga labing ubos sa tanang katawhan sa Dios, gihatagan sa Dios niining pribilihiyo sa pag-sangyaw sa Maayong Balita mahitungod sa dili masukod nga bahandi ni Cristo ngadto sa mga dili Judio.

—Efeso 3:8

Ang matuod ninyong kinabuhi mao si Cristo ug inigpakita niya, makita usab kamo uban kaniya ug moambit sa iyang himaya.

—Colosas 3:4

Apan magmalipayon ug mag-sadya unta ang tanan nga modangop kanimo! Ang tanan nga mapasalamaton sa kaluwasan nga gikan kanimo, moingon unta kanunay, “Pagkagamhanan sa GINOO!” —Salmo 40:16

Paglipay ug pagmaya, kamong mga matarong tungod sa nahimo sa GINOO!... —Salmo 32:11a

Paglipay kamo kanunay diha sa Ginoo. Sublion ko pag-ingon: paglipay kamo! —Filipos 4:4

Ug kining gamay ug lumalabay nga kalisdanan nga among

giantos naghatag kanamog labihan kadako ug walay kataposang himaya nga labaw kaayo kay sa mga kalisdanan.

—2 Corinto 4:17

Pagmaya pag-ayo, O katawhan sa Sion! Singgit, O katawhan sa Jerusalem! Moanha kanimo ang imong hari.... —Zacarias 9:9a

“Apan ayaw kamog kalipay tungod kay ang mga yawa mipatuo kaninyo kondili paglipay hinuon kamo kay ang inyong mga ngalan nahisulat didto sa langit.” —Lucas 10:20

36 ISALIKWAY MO BA SA DAYON ANG IYANG KALUOY?

Busa pagmatngon kamo ug ayaw pagdumili sa pagpamati kaniya nga nagsulti. Kadtong midumili sa pagpamati niadtong nagsangyaw sa mensahe sa Dios dinhi sa yuta wala gayod makalikay sa silot. Labi pa kitang dili makalikay kon isalikway nato siya nga nagsulti gikan gayod sa langit!
—Hebreo 12:25

“Mobangon ang pangulo sa panimalay ug sirhan niya ang pultahan. Unya magtindog kamo didto sa gawas ug magsugod kamo pagtuktok sa pultahan ug moingon, ‘Sir, ablihi intawon ang pultahan!’ Ug motubag siya

kaninyo, ‘Wala ako mahibalo kon taga diin kamo!’ ” —Lucas 13:25

Ang Kaluoy nga Isalikway Mahimong Kaligutgot

Gamiton niya ang tanang paa-gi aron malimbongan ang mga laglagonon. Pagalaglagon sila kay wala man nila dawata ug higugmaa ang kamatuoran. Kon gibuhat pa nila kini, maluwas unta sila. Tungod niini, gipadad-an sila sa Dios ug dakong kalibog aron motuo sila sa bakak ug aron kasilotan ang tanan nga wala motuo sa kamatuoran apan nagpatuyang hinuon sa pagpakasala. —2 Tesalonica 2:10-12

KINSA BA AKO KON WALA KINI NGA HARI? 37

Pagahukman Pinaagi sa Pulong

“Adunay mosilot niadtong mag-salikway kanako ug dili modawat sa akong mensahe. Ang pulong nga akong gisulti mao unya ang maghukom kaniya sa kataposang adlaw!” —Juan 12:48

Puno sa Sala, Hinukman sa Silot

“Ang tanan nga motuo sa Anak dili silotan. Apan kadtong dili motuo kaniya gisilotan na kay wala man siya motuo sa bugtong Anak sa Dios.” —Juan 3:18

Kay wala nay sakripisyo alang sa mga sala kon tuyoon gayod nato ang pagpakasala human kita makahibalo sa kamatuoran.

Ang nahibilin hinuon mao na lang ang kahadlok sa umaabot nga paghukom ug sa mabangis nga kalayo.... —Hebreo 10:26, 27a

Gihigugma ug Ginapangita

Gipadayag sa Dios ang iyang gugma kanato pinaagi sa pagpadala sa iyang bugtong Anak nganhi sa kalibotan aron makabaton kita sa kinabuhing walay kataposan pinaagi kaniya.

—1 Juan 4:9

Ang Espiritu ug ang Pangasaw-onon miingon, “Dali ngari!” Ug ang tanang nakadungog paingna usab, “Dali ngari!”...

—Gipadayag 22:17a

38 BUANG ANG TAWO NGA MOADTO SA IMPIYERNO

*Maoy Binuang ang Pagpuyo sa
Eternidad sa Dayon nga Kasakit
uban Kang Satanas Diha sa
Impiyerno nga Unta Matagam-
taman Mo man ang Dili Matukib
nga Kalipay Diha kang Cristo
nga Magalingkod sa Trono
Hangtod sa Kahangtoran*

Ang mga buangbuang nag-
ingon sa ilang kaugalingon, “Wa-
lay Dios.”... —Salmo 53:1a

Tungod niini miingon ang Ginoo
kaniya, “Kamong mga Pariseo
naghinlo sa gawas nga bahin
sa tasa ug plato apan ang su-

lod ninyo puno sa pagpanikas
ug kadaotan. Mga buang! Dili ba
ang Dios nga maoy nagbuhat sa
gawas nga bahin mao usab ang
nagbuhat sa sulod?”

—Lucas 11:39, 40

“Apan ang tanan nga nakadu-
ngog sa akong gisulti ug dili mo-
tuman niini, mahisama sa usa ka
tawong buangbuang nga nagtu-
kod sa iyang balay diha sa balas.
Sa dihang mibundak ang ulan ug
mibaha ug ang hangin mihapak
ug mikusokuso niadtong balaya,
natumba kini ug nagun-ob!”

—Mateo 7:26, 27

ANG IMPIYERNO MAO ANG DAPIT SA MAGASALIKWAY SA DIOS

39

*Ang Dapit Pagaadtoan sa Magsa-
salikway sa Hari sa Himaya*

“Mag-utbo sa walay kataposan ang aso sa kalayo nga magsakit kanila. Adlaw ug gabii mag-antos sa walay hunong kadtong misimba sa mananap ug sa larawan niini o si bisan kinsa nga napatikan sa ngalan sa mananap.”

—Gipadayag 14:11

Apan kon ang yuta tugkan ug mga tunok ug mga sagbot, wala kini kapuslanan ug tunglohon kini sa Dios ug laglagon pinaagi sa kalayo.

—Hebreo 6:8

“Ipadala unya sa Anak sa Tawo

ang iyang mga anghel. Hiposon nila gikan sa iyang gingharian ang tanan nga maoy nakaangin sa mga tawo sa pagpakasala, lakip ang tanan nga nagbuhat ug daotan. Itambog sila ngadto sa kalayo nga nagdilaab diin maghilak sila ug magkagot sa ilang ngipon.” —Mateo 13:41-42

Ang Dios Andam sa Pagbuhat ug mga Milagro Aron Mahalikay Kita sa Impiyerno, Sama sa Iyang Pagatubang sa Impiyerno Alang Kanto, Pagbuntog sa Kamatayon nga Dayon, ug sa Pagkabanhaw Aron Kita Makakaplag diha Kaniya Niini nga Kadaogan ug Mabuhi.

40 ANG HARI SA MGA HARI MOBILANGGO NI SATANAS

*Hingpit ug Dayon nga Kadaogan
Ibabaw ni Satanas*

Unya nakita ko ang usa ka anghel nga mikunsad gikan sa langit. Nagdala siyag dakong kadena ug yawi alang sa bung-aw nga dili matugkad. Gidakop niya ang dragon, ang karaang bitin nga mao ang Yawa o Satanas, ug gigapos kini sulod sa 1,000 ka tuig. Gitambog sa anghel ang yawa ngadto sa bung-aw unya iya kining gisirhan ug gitrangkahan aron ang yawa dili na makapanlimbong sa mga kanasoran hangtod nga matapos ang 1,000 ka tuig. Tapos ni-ana, buhian siya sulod sa mubong

panahon. —Gipadayag 20:1-3

Tapos sa 1,000 ka tuig, buhian si Satanas gikan sa bilanggoan. Ang Yawa nga naglimbong kanila gitambog usab ngadto sa linaw nga kalayo ug asupre diin gitambog ang mananap ug ang bakakong propeta. Didto sakiton sila adlaw ug gabii hangtod sa kahangtoran.

—Gipadayag 20:7 ug 10

...Si Jesus usab nahimong sama kanila ug miambit sa ilang tawhanon nga kinaiya. Gihimo niya kini aron nga pinaagi sa iyang kamatayon, malaglag niya ang Yawa nga may gahom batok sa kamatayon. —Hebreo 2:14b

HUKOM KARON KON KINSA ANG IMONG ALAGARON SA KAHANGTORAN

41

“Dili mahimo nga ang usa ka tawo magpaulipon sa duha ka agalon kay mahitabo gayod nga iyang dumtan ang usa ug ang usa iyang higugmaon o unongan niya ang usa ug ang usa iyang tamayon. Dili kamo makapaulipon sa Dios ug sa salapi.”

—Mateo 6:24

*Nagsunod ba Ikaw ni Satanas
Ngadto sa Bilanggoan?*

“‘Ikaw magpabuka sa ilang mga mata ug magtultol kanila gikan sa kangitngit ngadto sa kahayag ug gikan sa gahom ni Satanas ngad-

to sa Dios aron pinaagi sa ilang pagtuo kanako mapasaylo ang ilang mga sala ug madawat nila ang ilang dapit uban sa katawhan nga gibalaan sa Dios.’”

—Mga Buhat 26:18

“Apan ang mga talawan, ang mga wala magtuo, ang mga malaw-ay, ang mga mamumuno, ang mga makighilawason, ang mga salamangkero, ang mga nagsimbag mga diosdios ug ang tanang bakakon itambog gayod sa linaw nga kalayo ug asupre nga mao ang ikaduhang kamatayon.”

—Gipadayag 21:8

ANG BUHING MGA TUBIG NAGDAGAYDAY SA AKONG MGA TIIL

Si Jesus mitubag, “Kon nasa-yod ka pa unta sa gasa sa Dios, ug kon kinsa kining nangayo kanimog tubig, mangayo ka gayod unta kaniya ug hatagan ka niyag tubig nga naghatag sa kinabuhi.” —Juan 4:10

Gipakita usab sa anghel kanako ang suba sa tubig sa kinabuhi nga nagpangidlap daw kristal. Naggikan ang maong suba sa trono sa Dios ug sa Nating Karnero. Midagayday kini sa taliwala sa dalan sa siyudad. Sa isigkadaplin sa suba may kahoy nga naghatag sa kinabuhi nga

mamungag kausa matag bulan ug ang mga dahon niini tambal alang sa kanasoran. Walay bisan unsa nga tinunglo sa Dios nga makaplagan diha sa siyudad. Anaa sa siyudad ang trono sa Dios ug sa Nating Karnero ug simbahon siya sa mga alagad niya. —Gipadayag 22:1-3

“Kay ang Nating Karnero nga anaa sa taliwala sa trono maoy magbantay ug maggiya kanila ngadto sa tinubdan sa mga buhing tubig. Pahiran sa Dios ang tanang luha sa ilang mga mata.” —Gipadayag 7:17

NASIPYAT KA BA? SA KINASINGKASING PANGITAA SIYA!

43

“Apan labaw sa tanan, paharia ninyo ang Dios ug pagkinabuhi kamo uyon sa iyang kabubut-on ug ang ubang mga butang ihatag ra niya kaninyo.” —Mateo 6:33

Apan didto mangita kamo sa GINOO nga inyong Dios ug makitan ninyo siya kon mangita kamo kaniya sa bug-os ninyong kasingkasing. —Deuteronomio 4:29

Gihigugma ko ang nahigugma kanako; ang nangita kanako makakaplag kanako.

—Panultihon 8:17

“Sultihan ko sila, ‘Daroha ang

inyong uma, ug ipugas ang binhi sa katarong, aron maani ninyo ang bunga sa gugma nga walay paglubad. Panahon na nga pangitaon ninyo ako, ang GINOO, aron ipaulan ko kaninyo ang kaluwasan.’ ” —Oseas 10:12

Dangop sa GINOO samtang may panahon pa; sangpita ninyo siya samtang siya duol pa.

—Isaias 55:6

Pasalamatan ko ikaw sa tibuok kong kasingkasing, O Ginoo nga akong Dios. Isangyaw ko ang imong pagkagamhanan hangtod sa kahangtoran. —Salmo 86:12

44 ANG PANIHAPON SA KASAL—ANG DIOS NANGASAWA!

...Nadungog ko ang ilang pag-
ingon, “Dayga ang Dios kay
naghari ang Ginoo nga Labing
Gamhanan! Maghugyaw ug mag-
lipay kita ug daygon nato ang
iyang pagkagamhanan! Kay mia-
bot na ang panahon sa kasal sa
Nating Karnero ug andam na ang
iyang pangasaw-onon. Gipasul-
ob siya sa bisting lino nga sulaw
ang kaputi ug limpyo.” Ang lino
mao ang maayong binuhatan
sa katawhan sa Dios. Unya mii-
ngon ang anghel kanako, “Isulat
kini: Bulahan ang gidapit pag-
tambong sa bangkita sa kasal
sa Nating Karnero.” Ug miingon

pa gayod ang anghel, “Mao kini
ang matuod nga mga pulong sa
Dios.” —Gipadayag 19:6b-9

...“Dali ngari ug patan-awon ko
ikaw sa Pangasaw-onon sa Na-
ting Karnero.” Unya gigamhan
ako sa Espiritu ug gidala sa ang-
hel ngadto sa tumoy sa habog
kaayong bukid ug gipakita kana-
ko ang Jerusalem, ang Balaang
Siyudad nga mikunsad gikan sa
langit ug gikan sa Dios. Naggi-
lakgilak kini sa himaya sa Dios.
... Ug maglakaw ang katawhan
sa kalibotan diha sa kahayag nii-
ni....

—Gipadayag 21:9b-11a ug 24a

Magpasakop Kaniya

...Hinuon, itugyan sa Dios ang inyong kaugalingon ingon nga mga gibanhaw gikan sa kamatayon.... —Roma 6:13b

Mahigugma sa Bana

Ang grasya sa Dios maanaa sa tanan nga nahigugma sa atong Ginoong Jesu-Cristo sa gugma nga walay paglubad. —Efeso 6:24

Nahiusa Kaniya

...Pinaagi sa maong mga gasa ...ug makaambit sa diosnong kinaiya. —2 Pedro 1:4b

Puno sa Diosnong Paghigugma

Apan ang nagtuman sa iyang

sugo, nahingpit diha kaniya ang gugma sa Dios.... —1 Juan 2:5a

Walay Buling

Busa, mga hinigugma, samtang nagpaabot kamo nianang Adlaw, paningkamot kamo pagayo nga mahimo kamong putli ug dili masaway sa Dios ug may pakigdait kaniya. —2 Pedro 3:14

Magbaton sa Hingpit nga Grasya

...Ibutang gayod ang inyong paglaom diha sa grasya nga ihatag kaninyo sa panahon nga mapadayag na si Jesu-Cristo.

—1 Pedro 1:13b

LUMPAGON SA HARI ANG TIBUOK KALIBOTAN NGA REBELYON

“Ug makig-away sila sa Nating Karnero. Apan buntogon sila niya ug sa iyang mga tinawag ug pinili ug matinumanon nga mga alagad kay siya Ginoo man sa mga ginoo ug Hari sa mga hari.”

—Gipadayag 17:14

Ug mao kini ang kastigo nga ipahamtang sa GINOO sa mga nasod nga mangahas sa pagsulong sa Jerusalem: mag-anam ug kadunot ang ilang unod bisag buhi pa sila lakip ang ilang mga mata ug dila.

—Zacarias 14:12

Unya moabot ang kataposan ug buntogon ni Cristo ang tanang pangulo, mga awtoridad ug mga

kagamhanan. Unya itugyan niya ang Gingharian ngadto sa Dios nga Amahan. —1 Corinto 15:24

Unya ang Tawong Yawan-on moanhi ug patyon siya sa Ginoong Jesus pinaagi sa huyop ug sa kasulaw sa iyang pagpadayag.

—2 Tesalonica 2:8

Unya usa ka gamhanang angel ang mipunit ug bato nga sama kadako sa dakong galingan ug gitambog kini ngadto sa dagat ug miingon siya, “Sama niini kamakalilisang ang pagkapukan sa dakong siyudad sa Babilonia ug dili na gayod siya makita pagusab.” —Gipadayag 18:21

1,000 KA LIBO KA TUIG NGA PAGHARI (HONEYMOON) DINHI SA YUTA

47

“...Kay gipatay ka ug pinaagi sa imong dugo gitubos mo ang katawhan alang sa Dios.... Gihi-mo mo silang gingharian sa mga pari aron mag-alagad sa atong Dios; ug maghari sila sa kali-botan.” —Gipadayag 5:9b, 10

Bulahan kaayo ang nahiapil sa unang pagbanhaw. Wala nay ga-hom kanila ang ikaduhang kama-tayon. Mahimo silang mga pari sa Dios ug ni Cristo ug maghari sila uban kaniya sulod sa 1,000 ka tuig. —Gipadayag 20:6

...“Ang gingharian sa kalibotan

nahimo nang gingharian sa atong Ginoo ug sa iyang Cristo ug maghari siya hangtod sa ka-hangtoran!” —Gipadayag 11:15b

...Nakita ko usab ang mga ka-lag niadtong gipamunggotan tungod sa pagsangyaw nila sa kamatuoran nga gipadayag ni Jesus ug tungod sa pulong sa Dios. Wala sila mosimba sa ma-nanap o sa iyang larawan. Wala sila magpapatik sa ilang agtang ug kamot sa timaan sa mananap. Nabanhaw sila ug naghari uban kang Cristo sulod sa 1,000 ka tuig. —Gipadayag 20:4b

*Pagkamalipayon! Ang Dios ug Ako
Magakuyog sa Walay Kataposan*

...Maoy unang mabanhaw kad-
tong nangamatay nga nagtuo
kang Cristo. Unya kita nga buhi
pa niadtong adlaw, bayawon
uban kanila didto sa mga pa-
nganod aron pagsugat sa Ginoo.
Ug kita unya uban na kanunay sa
Ginoo. —1 Tesalonica 4:16b, 17

...“Karon ang puloy-anan sa
Dios ania na sa katawhan. Mag-
puyo na siya tipon kanila ug
sila mahimong iyang katawhan.
Ang Dios makig-uban kanila ug
siya mahimo nga ilang Dios.
Pahiran niya ang ilang luha ug

wala nay kamatayon o kasu-
bo, paghilak o kasakit kay na-
hanaw na man ang daang mga
butang.” —Gipadayag 21:3b, 4

Didto wala nay gabii ug dili na
sila magkinahanglan ug mga su-
ga o kahayag sa adlaw kay ang
Ginoong Dios mao may ilang ka-
hayag, ug maghari sila hangtod
sa kahangtoran. —Gipadayag 22:5

“Amahan, gihatag mo sila ka-
nako ug buot ko nga bisan asa
ako atua usab sila aron makakita
sila sa akong himaya, ang himaya
nga imong gihatag kanako....”

—Juan 17:24a

SI CRISTO NAG-INGON

“Ang modaog patuparon ko paglingkod sa akong trono ingon nga gipalingkod ako tupad sa akong Amahan diha sa iyang trono tungod kay midaog man ako.” —Gipadayag 3:21

**Diha Kang Cristo Ako Gihimo Alang sa Halangdon!
Ang Hingpit Nagtawag Kanako,
Ug Kinahanglan Moadto Ako,
Padayon Sa Kadaogan!**

Apan salamat sa Dios nga naghatag kanatog kadaogan pinaagi sa atong Ginoong Jesu-Cristo! Busa, mga minahal kong kaigsoonan, tindog kamo nga lig-on ug dili matarog. Pagkugi kamo kanunay sa inyong pag-alagad sa Ginoo kay nasayod kamo nga ang inyong pag-alagad dili gayod makawang.

—1 Corinto 15:57, 58

Scripture texts are taken from the *Ang Bag-ong Maayong Balita*, © 1999 Philippine Bible Society. Used with permission. All rights reserved.

Ang mga Basahon gikutlo gikan sa *Ang Bag-ong Maayong Balita Biblia* © 1999 sa Philippine Bible Society. Gigamit nga may pagtugot. *All rights reserved.*

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: www.wmp-contacts.org**

World Missionary Press
PO Box 120
New Paris, IN 46553-0120 USA
www.wmpress.org

1-25



Read booklets online or by App
www.wmp-readonline.org
532 Cebuano WAI